


# TUKULUHO YE TEZI

 Ne ni sa zibi hande za kubulela kakusasana cwana. Ne ni inzi kwa mulaho kwani Muzwale Egan, mi Na utwa . . . Muzwale Neville na sweli kubulela taba yeñwi cwalo, inge a ni talimezi. Mi Na bulelela Muzwale Egan kuli, “Kana wa ni biza nji?”

Mi kio hali, “Wa kubiza.”

<sup>2</sup> Mi cwale fa Nitile kulofa ku to bulela nto yeñwi kakusasana cwana. Ne ni sweli kunahana, hane Ni sweli . . . Se si fukisa moya kwani, kokuna ni . . . sa silelisanga linzwi, kubonahala fela kuli sa li silelisa katata, hausweli kubulela. Kubonahala kuli sifukiso sa moya kona se si silelisa linzwi.

Ne ni sweli kuteeleza cwalo . . . bupaki hane Ni li mwahali mwani ku yo lapelela musali fa luwaille. Mi ya nga amuhezi liñusa, na libezi kubeya fateni muleneñi wa sibaka kwa kulizeza, kuzwa ku musala Dr. Morrison. Mi Ni ka mi bulelela fela se Ni ezize, ka litapelo za mina kaufela, ni za ka. Na beya mazoho aka fa luwaille, ni kusupa fa nombolo, ko ne iinzi kaufela, ni ku kupa Moya o Kenile kuli uye kuyena musali yani. Kacwalo Ni sepa kuli Na ka utwa sani ka kuswana fela sina mwa Na ka ezeza haiba . . . Mwabona? Mi Na to ilula fela fafasi. Mi ikona kuba kuli yeo kona nzila ya na bata Mulena. Mwabona? Ikona kuba hande kuba cwalo.

<sup>3</sup> Mi cwale Na utwa bupaki hane Ni li kwani, ka yomuñwi ya na bulela kuli Kezeli Rook nana ni . . . Na lumela Muzwale Neville nabulezi kuli nana ni—ni kulyangana nyana mwa toho, cwalo. Ha lu kumaleleñi ku Mulimu ka seo, lu nze luhupula nto iliñwi ye kuli: Mulimu uziba Beili ba Hae. Wa ziba hande ka bona.

<sup>4</sup> Kana mwa utwa hande kwa mulaho kafoo? Haiba ha mu utwi, kuna ni lipula ze li mukungulu kwanu. Mwakona kucinca haiba mubata kueza cwalo. Mi, ha lu boneñi, kana maiki ye kona yebeleka hahulu? [Muzwale yomuñwi uli, “Batili, sha.”—Mu.] Yona yeinzi fa *ye* kona yebeleka hahulu? Kihande. Luka bona haiba lwakona kuba ni yona fakaufi nyana fela. Kucwani ka kuibeya fa cwana, Gene? Ikaba fela hande. Mi linako zeñwi Ni banga fela ya silezi linzwi; Ni bile ni kutaza fa ni fa. Kana kwa utwahala foo? Mwautwa hande foo?

<sup>5</sup> Mi kaniti lwa hupula bao mwa litapelo. Mi lubata kuzibisa mukopano o munde kuzwa kwa . . .

Mi Ni sweli kutalimela Kezeli Rook? Ne ni nahana inge kuli Ni sweli kutalima kalibe fa yabohala inge yena. Na hupula kuli, “Luli ha Ni buleli habeli cwale fa.” Ni talimezi mutu yaswana ni

yena, kwa mulaho kwani. U inzi mwa sipatela sa Saint Edward's Hospital.

<sup>6</sup> Mi kacwalo, kwa Cleveland, Tennessee, mi hape ni mwa California, neluba ni mikopano ye minde. Mulena na fuyozu hahulu, ni lika zeñata za Na ezize. Mi luitumezi ka seo. Lutabile kuli lukona kukuta kwanu kwa sicaba sa hesu, ku to zibisa bunde ni sishemo sa Mulimu. Kona mo ne ba ezelize mwa Bibebe.

<sup>7</sup> Ne ni sweli kuitumela ku Muzwale Neville, kamba tapelo ya Muzwale Beeler, mwa lapelezi sicaba, ni—ni ku kupa tuso ni sishemo. Mi haiba lu ka talima fela hande, mukana muba, kaufela zesweli kuezahala, mu ka fumana kuli kuna ni sa niti ka sona. Mi cwale Muzwale Neville ataha kutisa madikoni ba, ni babañwi cwalo, kwanu kwa katala, kuto—kuto bulela limbuyoti za Mulimu fa—fa koleko ya keleke, Ni mu utwile habulela mwa tapelo ya hae ku Mulimu, ka bona baana bani, ka mo ba lapelelanezi. Mi seo sa ni utwisa hande ku utwa mulisana yakona kulapelela madikoni ba hae, ni madikoni ba lepelele mulisana wa bona. Ha mubona keleke izamaya mwa kutwano yecwalo, hande, kuna ni se si libelezi kuezahala. Kona mo ilukela kubela keleke cwalo mwa sikuka. Mi si ni file feela mulelo wa tuto yaka. Ne ni bata kuambola fa mbuyoti ya kwa Kadesh, ni kuhana ku utwela piho ya matwela, kono he Ni cincize munahano waka, ku sesiñwi feela cwale.

<sup>8</sup> Mi cwale, kuama za foliso, Ni na ni feela bupaki nyana bo Ni tabela kufa. Ne ni sepa kuli Ni ka bona mushimani waka, Billy, kwa mulaho kwani, kono una ni bona mwa pokoto ya hae.

Mi Billy uya aba hande mwa mikopano, kufita mwa na belanga sapili. Na ikalelwanga, yafilikani, mi na bulelelanga batu kuli, “Oh, zamaya ina fafasi. Zamaya ina fafasi.” Uli, “Nika—Nika kufa kadi ya tapelo.” Kono Ni lemuhile, mazazi nyana, se ku kala kutala batu mwa mukopano bautwelanga makeke. Haiba haana kadi ya tapelo ye siyezi, kipeto uka ba beya mwa muzuzu kuli Ni yo ba lapelela.

<sup>9</sup> Mi taba yecwalo ne i ezahalile kwa Chicago, nako yefelile. Mi Ni tabela kubala liñolo lani ha sa kena fela. Ha ni si ka mubona. Na sa zibi kuli Ne ni taha kakusasana cwana, kwanu, nikuli—nikuli nibata—nibata liñolo lani. Kono Ni li hupuzi fela ha Ni hupuzi fela matuku amañata cwalo. Mi cwana kona mo liinezi. Ki liñolo le li kantilwe kuli . . .

Ne ni sweli kubala mwa mutende, (Nali kuba; ne ni bulelezwi) ka mo mutende wani no lwaniseza Oral Roberts, ka kulapelela musali yana kula dayabetisi mi a shwa. Mi Na, cwale, kakuba mu American, Ni—Ni lata kuteezeza kwa milao ni—ni mutu yasweli kubusa. Kono ni sepa kuli zeo ha li si ka luka. Hani zibi haiba ne ba ka tabela kubeya, mwa mutende, kaufela bana lapelezi Oral Robert ni kufoliswa, bao madokota ne ba palezwi. Ha ni zibi, ba li fetulanga ni ku li hatelela, mwabona. Habakoni

kueza cwalo. Mi cwale Ni nahana kuli mwendi diabulosi yani u ba lyanganisize cwalo, mane, mi Mulimu u lumelileze, kuli Lizazi la Katulo ba ka yo ikalabela ka zona. Kono Ni ziba likitkiti za batu bao Oral Roberts alapelezi, ba ba bata kushwa, mi baiketile.

<sup>10</sup> Kacwalo, mwa bona, bona, habana niti ka zona. Baka bulela neku la bona, siemba sa kunyaza fela, kono habana kubulela siemba sesiñwi. Cwale, mutende uswanela kubuluka sicaba siine si ziba hande likezahalo. Mi Ni nahana kuli, haiba batu ba tokomelana, haiba mutu afoliswa, kufoliswa luli, pampili ya mutende kaufela mwa United States iswanela kuñola taba yeo. Kono hamukoni ku ba shembeteta kueza cwalo. Batili. Ha mu ka kenya nto yecwalo mwateni, ba ka seha ni ku ikeshebisa, ni ku ikasheza kwa mulaho. Kono cwale haiba kuna ni sesiñwi sa kulwanisa. . . Sibonisa fela kuli naha ye i libelezi feela katulo. Kiniti. Mi ku lukela kuba katulo, mane hakuna mukwa wa ku i picuka. Mi bona basweli feela ku iyakela mulilo fa litho zabona, ni zeñwi cwalo. Mi ka zeo ki—ki. . . ku sa swalisana, kwa milao! Mutende, milao ya ona, ki ku—ku zibisa sicaba nyangela ni ndopu kuama nto yende kaufela kamba yemaswe, yesweli kuezahala. Kono babile kwahule hahulu ni milao yabona. Mi cwale habali kwahule ni milao yabona cwalo, kipeto ha—ha bana kusebeza musebezi wabona hande.

<sup>11</sup> Mi kona mo kuinezi ni kwa keleke. Mi keleke haili kwahule ni milao yayona, haikoni kutusa balumeli bayona hande. Luna ni kuina hamoho, lu swanela kutamahana. Lu swanela kuba ni pilu iliñwi mwa buñwi. Kamba, haluna kusebeleza Mulimu kamba sicaba, konji ha lu taba ni pilu iliñwi ni mwa buñwi, kuyema ka milao ya Bibeke mi ni lika zeo Mulimu abulezi ze lukile. Luswanela kuyema kamita ka yona.

<sup>12</sup> Billy ainelela mwa muzuzu, kwa Chicago, yena. . . Yomuñwi ataha ku yena, musali ni muuna hae, ni kansa yakwa maswafu, inza bulaiwa ki yona. Mi musala hae nali mukuli wa polio mwa sipula sa mawili, mi musali nasweli kulika kubabalela muuna ya na sa koni niheba kuyema, nana ni kansa kwa liswafu la hae. Mi Billy ali ku yena, ki hali, “Ni—Ni swabile, muñaka.” Ali, “Ni ka kufa kadi ya tapelo.” Mi ki hali, “Kono Ha—Ha nina niheba iliñwi yesiyezi.”

<sup>13</sup> Mi ki hali, “Kihande, ku lukile, mwanake.” Ki hali, “Kihande kaufela.” Ali, “Lu likile kutaha mo, kono ha likonahali ku luna.”

<sup>14</sup> Billy ali, “Ni ka ku bulelela sa kueza.” Ali, “Ni ka bulelela bondate. Mi Ni ka batisa mwahali, ni Ni ka ba zwiseza fande.” Mi ali, “Ha Ni ka eza cwalo, u sa utwa fela Liñusa la hae,” ali, “kipeto unge. . . kamba wena ni musala hao, mi kukena mwa muzuzu mwani mo Ne ni fita, mi Ni ka mi lapelela.”

15 “Oh,” ki hali, “kona likute leo, mwanake. Ki zende zeo.” Mwabona? Kuna ni—kuna ni mubonelo usili. Mwabona? “Kizende luli. Kihande luli.” Mwabona?

16 Mi busihu bwani, Billy, ha yo kuta kwani, niteñi nasika kwanisa kueza sa na bulezi, kuli nana ni mulamwa hae mwani wa muuna yana kula butuku bwa mazambwe kuzwa mali kwa maswafu. Mi ni mulamwa hae wa musali kwani, ya na kula butuku bwa kulota mali mwa mba, ka litombo za mwamba, hape kuli nakeni ni bona, inge ka mukwa wa kubatusa kukena mwahali cwalo. Una ni kutokomela, ku ka yo tala mwa muzuzu mwani, mwa bona. Kono kufita mwateñi ni ku balapelela, lu banga ni liñolo lelizwa kubona, ka poso, kuli muuna yani u folisizwe handende kwa kansa ya maswafu a hae. Muslai, mufumahali ya inzi mwa sipula sa mawili, u yemi, wa itamaeal kai ni kai ka kuiketa fela hande sina sapili. Muuna ya na kula mazambwe kuzwa mali kwa—a kwa maswafu, bakeñisa butuku bwani, u folile handende. Mi musala hae u iketile hande kwa litombo za mwamba. Babane ba bona ba folisizwe, baiketile! Ha ni zibi haiba mitende yakona kulakaza kupatalaza zeo. Mwabona? Mwabona? Mwabona? Oh! Kono Mulimu u sa li Mulimu. Yena u ezanga fela lika ka nzila ya Hae Tota, mwa ziba, mi Ki yomunde luli. Lu tabile hahulu kuziba kuli ki Yena Mulimu.

17 Ne lusweli kuambola kakusasana omuñwi ka za mukutazi yomunyinyani yeluziba, ya na zamayanga kwa ni kwa, inza lapelela bakuli ni lika kaufela. Mi a yo lapelela mutu mwa sipatela mwa Louisville, ni wa butuku bwa maswafu, kalibe yani ashwa. Mutu wa mwanana yani ali, “Kihande, hakuna tuso. . . Mulimu haana. . . Hakuna Mulimu mane. Kamba Na ka buluka Linzwi la Hae.” Ali, “Ni mu tozize inge—inge fela Bibeles mo i bulelezi. Haiba Ha buluki Linzwi la Hae, Ha ki Mulimu.” Ali, “Ki buka buka feela.”

18 Cwale, zeo likona kubonahala cwalo haiba ha u zibi Mulimu. Seo ki siemba sa Mañolo, kono ha ki ona Mañolo kakutala. Si itingile fa tumelo yeli ku mutu. Mwabona?

19 Mi Na bulelela musala ka, Na li, “Kubile lika zeñata hahulu ze ezahalile, ze Ni ziba fela ku ze liteni. Ha ni zibi ze ka ezahala kuna kwa mafelelezo. Nika sa na naya ka nzila yeswana. Haiba Mulimu u ka shenyisa lizoho la Hae la sishemo kuna, Ni ka ya ka nzila yeswana. Kono haibile fela Uka beya lizoho la Ha la sishemo ni zamaiso kuna, Ni ka zwelapili.” Kono Na buza Meda, Na li, “Kimañi yanali mwa muzuzu kakusasana wani kasumulaho ni bona pono ya musizana waka, Sharon?”

20 Nibulele cwana, zazi leliñwi, Ne ni batile kuwelela. Ne ni inzi mwa mukwakwa. Mi mwa ziba likande la ka ka pono ya hae, kasumulaho. Mi Na talima, ataha fakaufi, mi se kutaha musizana mwa mukwakwa wo fa mwa Jeffersonville, yanali feela

inge mwa pono. Na swala mazoho hamoho. Na bonahala hahulu inge wa mwa pono ya Sharon waka yomunyinyani! Na li feela musizana nyana.

<sup>21</sup> Mi kasumulaho wa pono ya kakusasana wani, kanti u mwa Kanya, Na . . . Sepa nasweli ni bulelela, inza ni beile lizoho fa liheta, kuli, “Usike wa bilaela ka luna, Bill. Lu iketile hande.” Ne ni sweli feela kubata kuipulaya. Mi ki hali, “Usike wa bilaela. Ni sepise kuli hauna kubilaela hahulu.”

<sup>22</sup> Mi Na li, “Hanikoni kusepisa cwalo, Hope, kakuli Ni—Ni—Nina . . . Na bilaela. Hakuna mo ni kona kuezeza.”

<sup>23</sup> Mi Na zwa mwa pono, naipumana ni yemi mwa muzuzu. Mi ha ki pono, haki ku nahanisisa, kono lizoho la hae ne li ni sweli. Mi na ni sweli fa liheta. Na hupula kuli, “Libelela fa muzuzu. Se ha ki . . .” Ne ni sa zibi mwa ku ibizeza mwa mazazi ani, ki pono. Ne ni ibiza kuli tolo ya musihali. “Le ki . . . Lizoho la hae ne li saliteni fani.” Na li, “Kana uteni mo, Hope?”

<sup>24</sup> Ki hali, “Bill, ni sepise kuli hauna kubilaela niheba hanyinyani ka na ni Sharon.” Kakuli, Ne nili kwa mafelelezo a musipili. Ne ni itukiselize kuipulaya.

Na li, “Na kusepisa.” Mi a ni kumbatela, ni ku ni natanata ka lizoho la hae.

Mi cwale Na—Na li, “Hope, u kai?” Na ya . . . na utwisisa, kufitela Ni swala fa liwenge nyana fa liseli ni kulihola. Na potoloha kwa ni kwa, kubata kwa sipula ni sipula, kubona haiba kona kwa na inzi.

Ki Mulimu. U cwalo ki Mulimu, ni kacenu, sina Mwa na inezi fa Lilundu la Petuho fani Mushe ni Elia ha ba bonahala. U sali Mulimu.

<sup>25</sup> Lwakona kufita mwa matata amañata ni miliko. Muhupule feel kuli, kuna ni Yomuñwi Ya ziba, ukamonyeha liseli mwa nzila, ku libonahalisa hande. Ha ni zibi ze li kwa mulaho wa lisila. Kono ni ziba nto iliñwi, Ni ikataleza kuliba kwa pizo yepahami, zazi ni zazi, nilika kupilela yona nako tuna yani ye ka ezahala zazi leliñwi; ha Ni ka Mu bona, pata ni pata, ni kubulela likande la, “Kupiliswa ka sishemo.” Lani kona lizazi le Ni pilela. Kusiya litaba zani zeli kwa mulaho, ili zeo, Ni bata kuikataza, kuzwelapili kuya.

<sup>26</sup> Ni bata kuli tabernakele yee, cwale hamuse muyemi ka mahutu, Ni bata kuli muzwelepili kuikataleza pizo ye pahami yani. Kaufela so eza, muswalane hamoho, mube feela mwa swalisano mo mukona kubela, kono kamita lube ni lizoho le li otolohile, la kuswala yomuñwi, kuli akene mwahali. Kono ku yona Tumelo yelusweli kukutaza ye cwale ni kuikataza ka yona, musike mwa shenya niheba hanyinyani ku Yona. Kakuli, haiba u ni lumela kuba mutanga Hae, ye kona tkiso ya Mulimu. Haina kuba mwa buñata. Kamita ikana iba mwa bunyinyani, kamita

kubile cwalo mi kukana kubanga ona cwalo. Kono, muhupule, ku ñozwi kuli, “Musike mwa saba, mutapi o munyinyani; ki tato yende ya Ndatamina ku mifa Mubuso.”

<sup>27</sup> Cwale, kuna ni sikwata sa liofisi za keleke, madikoni, basepahali, muluti wa sikolo sa la Sunda, balisana, sina keleke yaluna mo i beezwi mwa sikuka. Mi mina, sicaba, ki mina muketile liofisi ze ni mulisana yoo. Na kina mutoneli yomutuna, ka kubona kuli za zwelapili cwalo, ni kufa kelezo ni zeñwi cwalo. Ki mina muketa mulisana wa mina, muketa basepahali ba mina, muketa madikoni bamina, muketa ofisi yeliteni mwa keleke mwani; mina, sicaba. Mi ki musebezi wa hao kuyema ni bona baana bani, mwabona, kakuli ba kaba ni mafolisa. Ki batu feela babashwa. Ki batu feela, mi ba kaba ni mafosisa. Kono haiba Mueteleli wa United State uba ni mafosisa, kikuli lu ka mukasheza kwande, kakuli ki Mueteleli? Lwa libala ka zona kuzwelapili. Kona mo lu batela kuezeza cwalo mwa keleke yaluna. Ne ni sweli ku mu lapelela, mizuzu nyana yefitile, bona madikoni bani. Ni ku utwa kwa mulaho kwani, za bupaki, fa sikwalo, kwa basepahali, kuli mane ka buñwi mina kaufela mu cwalo. Cwale muine fela ona cwalo. Cwale, mina mamembala muyeme nibona basepahali baa, madikoni, ni mulisana, ni mulisana. Mi muhupule, hamuba ni zeo hamoho, muhupule woo ki musebezi wa diabulosi kubona kuli alyanganise zeo. Cwale kubile cwalo kamita mi kukana kuba cwalo kamita. Kono muyeme hamoho ni babamwa liofisi, mi yeo neli yona ngambolo yene Ni ka bulela.

<sup>28</sup> Mi cwale Ni nani fa zeñwi . . . sesiñwi se si ñozwi fa limati kakusasana cwana, ka mukopano wa tutengo ni puso yatona. Mi li kaba fa limati za zibiso. Mi Ni na ni kalulo pampili ya Muzwale Roberson, yali yena muina sipula kwa- . . . sa basepahali. Mi hape Ni na ni pampili ya Muzwale Collins, Na sepa, ya yemela muina sipula sa katengo ka madikoni. Mi cwale, liofisi ze kaufela li lukisizwe hande ka Mañolo, mi ba lukela kuba ni milao ya Mañolo ya se ba lukela kueza. Kabakaleo, basepahali bana ni ofisi yabona tota. Mi madikoni ba na ni ofisi ya bona tota. Muluti wa sikolo sa la Sunda una ni ofisi ya hae tota. Mi mulisana ki yena toho ta mutapi.

<sup>29</sup> Cwale, ifi ni ifi ya yona yaswana ka manzwi amañwi. Mi Ni sepa kuli mukopano wa mina haukoni kubanga hamoho, kono una ni kuba sina omuñwi kaufela mwa ofisi, kakuli madikoni hakuna ze bana ni kubulelela basepahali konji haiba kuna ni ze ba bata kubafa. Ni kushutanisa cwalo, basepahali ba tokomela masheleñi ni libyana za muyaho; habana za kueza ni madikoni. Madikoni ki mapolisa ba keleke, ni batusi ku mulisana. Mi basepahali kona ba babaleli ba lifa kamukana. Basepahali habana sa kueza ni litaba za moya, mi madikoni habana sa kueza ni za masheleñi. Kabakaleo, kwa swanela kuba cwalo. Mi muluti wa sikolo sa la Sunda yena utokomela feela za

sikolo sa la Sunda sa hae. Kacwalo Ni na ni zona liñozwi kaufela, litaipilwe, kuli li be fa limati la lizibiso.

<sup>30</sup> Mi cwale lu ka ya hape, mwa mukwa cwalo, wa Tuto yeo keleke iyemela, ni ku U tomahanya hande mo, mwa keleke; se lu yemela, yona—yona milao, ili Tuto ya keleke. Cwale, kwa keleke, luna ni kuba ni tuto.

<sup>31</sup> Ha lu i wisezi fafasi kuikataza kaufela, ni kubulela kuli, “Luya fela butelele bo bukuma *faa* kihona.” Luna ni kuzwela kwande fabule nyana, lu yo ikambota ni mutu kaufela, yoo Mulimu uka lumeleza kuzamaya, mwa Mañolo a Hae, ni sicaba. Mi cwale muswalane hamoho, mube mwa buñwi, pilu iliñwi, ni kuzamaela Mulimu. Cwalo kona Mulimu mo abatela kuli lueze.

Cwale ha lu lapeleni, mi ni kuapula Linzwi.

<sup>32</sup> O Mulena yomunde, luna cwale luatumela Linzwi le li Pahami, kamba kubala kwa Linzwi. Mi Moya wa Hao o Kenile u lu tolokele ze lutokwile. Mi lu konise kubulela, Mulena, ka kuziba kuli luna kaufela lu bana ba Hao, ka sishemo, sina Mo lu bizelize. Mi hakube sebelezo mwa keleke ye, ka kubona kuli se lu sutelezi bukaufi ni muzamao omutuna cwalo, lwa ikutwa, ka kutisa bakutazi babañwi ku ya mwa masimu kafoo, haiba Uka ni luma mwa libaka za lifasi ze shutana, ku yo tomahanya Tumelo, ni kuba mukutazi ya itukisize mi ya itakaleza, ni ya lutilwe kuli ange musebezi. Mi cwale Tumelo ye ne kile yafiwa hañwi kwa balumeli, yona ye lu yemela ka kutiya, itahe mwa sikwenda inze i potoloha lifasi. Lumeleza cwalo, Mulena. Libunda nyana la bucwani le, sina mo ne liinezi zazi leliñwi ha lu li beya ku Wena, hakube keleke ye ka nanuha ona fa, Mulena, kuli ku sona sikwata se kufumanehe bakutazi ni babuleli ni baluti ni bahasanyi ba linzwi, kuya kwa libaka kaufela za lifasi.

<sup>33</sup> Lukupela kwateni, kakusasana cwana, mbuyoti ye ipitezi ku Muzwale ni Kezeli Stricker yasweli kukula cwale. Kono lu ziba kuli kaufela luna lubeiwanga fa litatubo zee. Mwana kaufela ya taha ku Mulimu u swanezi ku shapiwa, ni kulikiwa. Mi haiba lu itoboha kabunolo, ni ku kuta, kipeto foo lu bana ba mwa bucwani, mi isi bana luli ba Mulimu. Fa Muzwale ni Kezeli Stricker mata ni kutiya, a ku kumalela kwa sibaka sa musebezi wa bona. Haiba bana ni ku kupelela lico ze baca, lumeleza lizoho la Hao la mbuyoti libe fahalimwa bona. Kakuli ha lu zibi kono ilukela kuba ka ona mata ao kuli U bonise mutu wa kwa Africa yoo Mukreste wa niti ali yena. Lumeleza cwalo, Mulena. Cwale ha liezahale kuya ka tato ya Hao.

<sup>34</sup> Fuyola mulisana yoo, Muzwale Neville. Lwa lapela, Mulena, kuli U mueze mulisana wa mutapi, sina Mo ezelize linako za kale. Mi haluna ku libala musala hae ya lateha, mufumahali yomunyinyani ya kulile maswemaswe. Sila u bata kusiya Muzwale Neville ni sikwata sa banana sani, basina maa bona, kono luyema ni kutoma, ka tumelo, Mali a Jesu Kreste mwahala

sila sani ni kezela luna. Mi Moya wa Hao, Mulena, ube omutuna fahalimwa hae, ka kuziba kuli basali kaufela ba tomezwi kuzamaya ona mwa musindi woo, wa lififi la lusika loo, kono lwa lapela kuli U be ni yena. Fuyola banana babanyinyani bani. Ukaba ya ikalelwa cwale, mi ya felezwi ki mata, kono cwale Moya o Kenile ube fa munyako wa sishemo, ka linako kaufela, kwa lubasi lwani.

<sup>35</sup> Fuyola katengo kaluna ka basepahali, waluna Muzwale Wood, ni Muzwale Egan waluna, Muzwale Roberson, ni babañwi bani kaufela, Mulena. Madikoni, basepahali, ni bona kaufela baba tamahani ni keleke, lwa lapela, Mulena, kuli Wena u ba lumeleze ba sebeze nako yabona ka kukena ni—ni kuluka. Fuyola nibona, Mulena, baba sebelize kwa linako za kwa kale. Mi lu lapela kuli U zwelepili kuba ni luna kamukana, kuli lu zibahala ka kuba keleke yeswalisani, ni Moya ni lilato la Mulena. Lu lapela cwale kuli U lu abele Linzwi, ka mo lutokwela, hanze lu bala Linzwi la Hao le liñozwi. Kakuli lu kupa ka Libizo la Jesu. Amen.

<sup>36</sup> Mi ka kulapela, Ne ni sweli kunahana hane lusweli kufuyola kamba kukupa limbuyoti zaluna za kacenu . . . katengo kaluna kakanca ka basepahali ni zeñwi cwalo, Ne ni sweli kunahana Muzwale waluna Fleeman ni Muzwale Deitzman ni babañwi babainzi fa, baba sebelize hande, linako zapili. Mi lu bata kuitumela ku Mulimu ka sebelezo yabona ya kuishuwa. Mi Mulena abe ni bona kamita, ku ba fuyola ni ku ba tusa. Ni bata kubala ni si ka . . . Fela muhupule fela cwale, limati la zibiso ni zeñwi cwalo, ni mikopano ye taha.

<sup>37</sup> Mi lu tabezi kuba ni luna, kakusasana cwana . . . Kihande, Na kona kubulela cwana, muuna yabile yomunde hahulu kuna, mwa linako za kale, mi zende cwale, muzwale yomunde, Fred Sothmann, yazwa . . . ni musala hae yazwa kwa Saskatchewan, Canada, yaliteni kwanu ku to zamaya ni luna, mwa naha yaluna, muzamayi; kono mwa kopano yaluna, ki muzwale ya lateha, Muzwale Fred Sothmann yainzi fani. Ki yena ya tokomelanga mikopano yaka ha Nili mwa Canada.

<sup>38</sup> Ni muzwale yomuñwi yomunde yanali mu Canadian sapili, yanali muuna wa pisinisi, mi wakona kubonisa kwa lifasi kuli haukoni kufana kufita Mulimu. Yena ni mulikana hae bapangile katengo ka masheleñi a kuyaha sibaka cwalo, kamba sa misebezi ya kwa linaha zakwahule, ki katengo. Mi ba ni bizeza kwa Oakland, kwa mukopano, ni kubulela kuli nebana ni masheleñi. Ne ba lifela lika kaufela, mwa katengo ka bona.

<sup>39</sup> Muzwale Fred mi Na lika cwalo ka masheleñi ao Muzwale Fred nabile ni ona, one Ni si ke makwanisa kakuba ninosi. Kacwalo he lwa itakaleza feela kuli lu afe kwa sicaba sa ma Canadian mi mane kusina niheba kuamuhela nubu, kono ne li si ka zamaya hande. Mikopano ne ili feela hande. Kono kakuli ne lu



si ka amuhela nubu. . . Hanina taba haiba keleke yakona kuba ni madollar akuma fa handeleti billioni, mu sa na ni sikoloti seo, ku Mulimu, kuli mu amuhele nubu. Seo ki siemba sa milapelo. Mi mwa putelela seo. . . Kuya fela ka mo Ni lwaniseza za masheleñi ni lika zecwalo, Na li fumana, haiba mutu u fosize, u swanela kuitumelela ha u fosize, kakuli Muzwale Fred ni Na luboni kuli ha ki zende hahulu.

<sup>40</sup> Mi, Muzwale Borders, ha Ni si ya Muzwale Fred ni kutaha kwanu ku mina kwa Oakland, Na li, “Musike wa eza cwalo. Mu fitise fela mukeke wa koleko, munge lineo, mi, kaufela se si ka fumaneha, mu si bulukele mwa katengo ka mina kwa mukopano kokuñwi.”

<sup>41</sup> Mi lisebelezo li si ka kwala kale, Muzwale Border ni balikani ba hae bataha kuna, mi bali, “Kuya ka mo lubeezi mwa—mwa mukopano, kaufela zona likwanile hande.”

<sup>42</sup> Mi cwale, mazazi nyana kwa mulaho, a lukisa mukopano mwa San Jose, California, kwa na bile ni babañwi, Ni sepa neli likeleke ze sikisie kamba sebente mwa musindi, kaufela bona ba tumelo ye shutani kaufela inge ba utwana. Ne lubile ni mukopano omunde, ni kukuta hape, ka Njimwana. Lu tabile fa kuba ni mina mwahala luna, Muzwale Borders ni Muzwale Fred babainezi kwa mulaho kafoo. Mi baana baa mwendi ki baenyi ku mina kaufela, kono babile mizwale babande kuna kwande mwa masimu, inge ba ikataleza Tumelo ye lu yemela. Mulimu aku fuyole, muzwale. Lu tabile kuba ni wena kakusasana cwana, mwa tabernakele yenyinyani ya kale ye mo. Ha ki yetuna kuli luikuhumuse. Kono kuna ni sesiñwi mo, seo, lu ziba kuli Mulimu upila mo, mwa bona, kacwalo lu tabile ka seo. Mi kuna ni mizwale yeñwi yeminde, kambe Ni na ni nako ya ku ba punda, babali ni luna kacenu.

<sup>43</sup> Cwale Ni kulubela ni kulapela kuli mwa mazazi nyana a likani, haiba Mulena alata, Ni bata kuya, ni i kutwa kuetelelwa. . . Ha ni si ka fa zibiso. Mukopano otatama, kwa Ohio, ku yo ba ni Muzwale Sullivan, kwa libaka za mafulo, ka nako yekuswani. Ki limaili feela ze mianda yemilalu kukambama kulo kwani, Na sepa, Gene, nto yeñwi yecwalo. Ikaba musipili omunde, haiba hamu si ka lukisa kale misipili yamina, haiba Mulena azwelapili ku lu zamaisa. Ki muuna yomunde luli, mi lu itumela ku Muzwale Sullivan, hahulu mane. Fela ki. . . Ki yena mubusisi ya tolopo. Nabanga mubusisi sapili, mane na li fela mu Kentuckian wa kale. Kona fela ze Ni kona kubulela ka yena. Ha Ni mu katana zazi leliñwi mwa. . . Ne lu hulezi bubeli bwa luna mwa malundu a Kentucky. A li kuna, “Kana u sa na ni mulyani wa asafetida mwa mulala wa hao, Billy?” Cwale mwa ziba yena—yena bu Kentucky bwa hae. Cwale ha lu apuleñi. . .

Ha ni shwauli mizwale ba Kentucky mo, Muzwale Jefferies, ni babañwi cwalo. Nina ni mu Kentuckian, hape, mwa ziba. Ni ka mi bulelela nto iliñwi yeluli yona. Ha lu ma Kentuckian, kamba niheba kuba ma American. Lu baenyi ni bazamayi. Lu bata Munzi o sa taha.

<sup>44</sup> Cwale kwa palo, ha lu baleñi mwa Buka ya Exoda, fa mizuzu yelikani. Ni lakaza kubala kuzwa mwa kauhanyo ya 23, ni timana ya 20 kuya fa 23, hamoho cwalo. Mi Ni bata kunga tuto kakusasana wo, yezwa sina cwana, ya kuli, nitaluse: *Tukuluho Ye Tezi*. Mi Hanina ku liyeha, kubulela, cwale hane Ni sweli kulibelega kuli muapule mwa Buka ni kauhanyo.

*Amubone, Ni mi lumela Lingeloi fapila mina, li mi buluke mwa nzila, ni ku mi tisa mwa sibaka se Ni lukisize.*

*Mu li tokomele, . . . muutwe linzwi la lona, musike mwa li halifisa; hakuli hana kuswalela bumaswe bwa mina: kakuli libizo la ka li ku yena.*

Ni sepa kuli kopano yaziba yoo Lingeloi le nali yena. “Libizo la Ka li ku Yena.”

*Mi haiba mu ka utwela linzwi la hae, ni mwaeza kamukana ze Ni bulela; kipeto Ni kaba sila kwa lila za mina, ni mulwanisi kwa balwanisi ba mina.*

*Kakuli Lingeloi la ka lika mi zamaya kwapili, ni kumitisa . . . kwa ma Amori, . . . kwa Mahiti, . . . Maperezi, . . . Makanana, . . . Mahivi, ni . . . Majebusi: mi Ni ka ba bulaya kamukana bona.*

<sup>45</sup> Mi Mulena afuyole Linzwi la Hae halunze lubulela cwale ka mizuzu yelikani, haiba mu lapela. Ne ni sweli kunahana fa tuto ye yakuli: *Tukuluho Ye Tezi*.

Keleke ibile mwa—mwa bunyinyani. Ikaba ibanga cwalo kamita, mwa batu babakuyona, kufitela Jesu ataha. Kono Ipila mwatasi a matohonolo e I filwe ki Mulimu. Kambe fela lwa ziba, ye kona Keleke ya Mulimu yapila; isiñi Branham Tabernacle, kono Branham Tabernacle ki siemba feela sa Yona. Kuna ni litabernakele zeñwi zecwana mwa naha kaufela.

<sup>46</sup> Muzwale Snelling, busihu boo, una ni sebelezo ya kolobezo. Ni libezi Muzwale Curtis na ni bulelela kuli ni zibise cwalo, kamba na ni bulelezi maabani, kuli na bile ni yona. Una ni sebelezo ya kolobezo. Mi haiba yomuñwi mo ha si ka kolobezwa, kale, kupalañi, Muzwale Snelling uka tabela kuezwa cwalo, busihu boo. Yeo ki Holiness Tabernacle kwa Utica. Ni Muzwale Junior Jackson, mwa New Albany. Mi kuna ni likeleke zeñata ze cwalo mwahala naha kaufela. Kono kaufela lu pila, mo ku bonahalela cwalo, kwa neku le li komilwe, hahulu, mane.

<sup>47</sup> Ne ni utwa Muzwale Neville ha zibahalisa kakusasana cwana, kwa mulaho kwani, kuli sitile mwa muhupulo waka, kuli

sicaba sibonahala kuba kwahule ni tukuluho. Ku bonahala kuba nto isili, kuli, sicaba si iboni, kacwalo ba li hohela feela kwa neku li li liñwi, “Oh, kihande, Mulimu wakona kueza cwalo.” Kono woo ha ki ona mubonelo.

<sup>48</sup> Cwale, Mushe, ha na bizizwe ki Mulimu, nali mupolofita yatezi, ya kwanile hande.

Mi Mulimu ha luma mutu kueza sika, U mufa kamukana za tokwa kuli abelekise. Haiba Mulimu ubiza mutu kuba mukutazi, Uka beya sesiñwi ku yena sa kukutaza ka sona. Haiba U mubizize kuba muluti, Uka beya sesiñwi ku yena sa kuluta ka sona. Haiba Amu biza kuba mupolofita Uka beya sesiñwi ku yena, sa kubonisanga lipono ni ku ba mupolofita. Mulimu nako kaufela u apesanga muuna wa Hae handende.

Ona cwalo kona sa Na ezize ha Na lumile Mushe mwa Egepita. A mu huliseza ka nzila yeñwi. Mi A mu kenya sikolo ka nzila yeñwi, mi A mu bupa, ni ku mueza, ni ku mu shutanisa. Kasamulaho Amano sepisa Abrahama, mianda anda kwa mulaho sapili, kuli Na ka lamulela sicaba, kipeto Na—Na ikupulezi mwa munahano kuli uka eza Mushe ka mwa na bupezwi fela Mushe. Mushe nali mupolofita ya kwanile hande. Mi, he, kakuba mupolofita ya kwanile hande, cwale. . .

<sup>49</sup> Kuswana fela inge wena, haiba u Mukreste, Mulimu haezi Bakreste balicika. Mulimu uezanga Bakreste baba kwanile. Mulimu haezi bakutazi ba licika, kono mukutazi wakona kuba wa licika. Mi Mulimu ueza bana ba Hae kuba Bakreste, kono linako zeñwi kuna ni Mukreste wa likica. Kono ha ki mulelo wa Mulimu kuli ba bange cwalo. Ki linzila za bona bañi ze lyangani ni mulelo wa Mulimu ka bupilo bwa bona, mi kona ze ba eza kuba mo bainezi. Mulimu halati kuli babe Bakreste ba licika, kamba bakutazi ba licika, inge ba keshebisa kwa neku leliñwi, kamba. . . U bata kuli bayeme mwa pakani ka kutala.

<sup>50</sup> Cwale, Mushe, Mulimu na muezize mupolofita ya kwanile, ka tukuluho ye tezi. Mi Mushe na ipile ka kufelegelela mwa mazoho a Mulimu. Kona ha na eizizwe mwa na bezi. Na li ya kwanile handende ku Mulimu kuli mane Mulimu amu sepa.

<sup>51</sup> Ha ni zibi, kakusasana cwana, sina Bakreste, haiba lu file ka tato yaluna, ni kuipa luna bañi ka kufelegelela ku Mulimu, kufitela mane Mulimu alusepa fa sibaka Sa lu beile ku sona. Ha nizibi, kakusasana cwana, ka na, haiba Ni kona fela kuipa luli ku Mulimu kufitela mane Mulimu a ni sepe, wakona kusepa Muzwale Neville, wakona kusepa katengo kaluna ka basepahali, katengo kaluna ba basepahali, kamba ma membala ba keleke yaluna. Kaufela luna ni sicaba, mi luna ni musebezi.

<sup>52</sup> Mukutazi una ni sibaka sa musebezi, kuyema ni kukutaza zeama sifumu se si sina palo sa Krete, kusina ku keshebisa, haiba u bizwa mukutazi. Na si ka siya sika ni sesikana ku mutu alimuñwi, haiba u bizwa mukutazi.

<sup>53</sup> Mi membala wa keleke, ha bizelizwe kuba membala wa sikwata sesiñwi se, mi haana ku keshebisa. Haiba keleke ilumela kuli halu swaneli kulaula, kipeto membala yo halukeli kuswala sikwakwati sa makadi a njuka. Ha lu lumeli mwa kunwa, u swanela kusikulula toho ya hae kuzwa kwa kunwa. Haiba lu sa lumeli mwa kulaula, kamba kuzuba, membala wa keleke ye ha swaneli kuswala nto yecwalo. Mulimu ufa tukuluho yetezi. Mi halu . . .

Uka li eza haiba luipa ili luna ka kufelelela ku Yena. Haiba luli luka ipa ili luna kufelelela mwa lizoho la Hae, kipeto Mulimu wakona kupila ku luna. Kreste, Sepo ya Kanya, Wakona ku iponahaza Iliyena ku luna halunze luzwa mwa nzila. Mi mihupulo yaluna ki mihupulo ya Hae. Kana mwakona kunahana kuli Kreste a ka zuba kwai? Munahana kuli Kreste wakona kunwa bucwala, kamba kubapala makadi? Mi haiba moya wa hao ki siemba sa Moya wa Hae, Ubata kuli ube ona mubulelelo wa hao. Kono u lumelelize diabulosi kutaha mwateni ni ku to hatelela. Mi nako kaufela, mwa pilu ya hao, mwatasi luli, u ziba kuli wa fosa ha ueza lika zeo.

Mi cwale membala alimuñwi ha na ka bulela kulwanisa membala yomuñwi, mu ziba ze fosahalile. Mu lalelwa kuli mu lapelelanange yomuñwi ni yomuñwi, isiñi kusebana mwahala mina, kono ku latana yomuñwi ni yomuñwi. Mi haiba yomuñwi u wile, ha lu mu nanuleñi, lu mu tuse. Cwale, seo si lueza ku—ku—ku ba sikwata sa balumeli ba ba tamahani. Cwale, ha lu sa utweli seo, kipeto ha lu utweli Mulimu mi ha lu tabisi Mulimu. Mi kabakaleo, keleke yaluna, sicaba saluna hasikoni kufuma, keleke haikoni kuzwelapili, kakuli ha lu si ka swalisana, hamoho. Sina Jesu ha naize, “Mumela o likani uka sinyi liñende kaufela.”

<sup>54</sup> Cwale, haiba katengo ka keleke, kamba inge ma—ma madikoni, bakona kutaha ni kubulela kuli neluli kwa . . . kunahana kuli neluswanela kuyaha tabernakele yenca. Haiba yeo ki keto ya madikoni, mi basepahali ba buzizwe mi habana masheleñi a ku eza cwalo, kipeto bana ni tukiso ya muyaho sina osweli kuezahala kwanu cwale. Mi kipeto li ingile sicaba kaufela, ka mo luswanela kubela, keleke kaufela kakuba ye icemezi. Mi cwale haiba keleke iketa kuba ni tabernakele yenca, kipeto kaufela luswanela ku zamaelela hamoho kuli luyahe tabernakele yenca.

<sup>55</sup> Kaniti, na kasibili, hane ba bulezi za tabernakele yenca, ku na, Ne ni lwanisa taba muhupulo woo. Yeo ki niti. Na li, “Ha lu tokwi tabernakele yenca mane. Ni ka be ni funduka kuzwa fa cwanoñu fa, haiba Mulena . . . haiba kona Sa ka ni bonisa kuli si to ezahala. Kiñi se lu tokwela tabernakele yenca? Haluna masheleñi.”

<sup>56</sup> Mi Na tahelwa ki maikuto a keleke, kuli keleke, mwa buñata, i bonahala kubata ona zeo. Cwale ki sikamañi sene Ni ezize? Na itoboha milelo yaka tota ni kuzamaelela ni keleke. Luli, ha luezeñi cwalo. Haiba . . . Cwalo kona mo lu nuhelanga lika, kona mo ne ku ezezwa mwa nako ya Bibebe, keleke mo ne i botelanga. Bu—bu icemeli, likwata za sicaba, ba tahanga hamoho. Mwa tamahano kuna ni mata. Kacwalo, kabakaleo, Na li, “Kaniti, haiba cwalo kona mo ibatela keleke, haiba kona mwa batela Mulimu cwalo, Una ni mata hahulu a kubota mwahala sikwata kaufela sa sicaba kufita Mo abezi ku na, kakuli Ne ni sina pono ya kubulela kuli hailukeli kuba cwalo.” Kacwalo lu kenelela feela ni keleke ni ku zamaelela hamoho ni keleke. Mi Ni kwa mulaho, kueza ze Ni kona kaufela, mwabona, kwa kutusa keleke.

<sup>57</sup> O ilukela kuba mulelo wa Mukreste kaufela ni mutu kaufela mwa keleke, ki kwa swalisano yaluna bañi ni kuba hamoho. Kaufela se i keta keleke, zeo kona ze luna ni kuyemela. Mi bali, kamutala, ki . . . kubata kucinca sesiñwi mwa keleke. Kihande, mi, haiba basepahali ba bata kuba, ki . . . yomuñwi fela ubata kuli, madikoni, babata kucinca sesiñwi, zeo litiswa fapila keleke, keleke kasamulaho hamoho. Mi haiba waluna—haiba mulelo waluna mo ubonahala kushutana nyana kufita se ibulezi keleke kaufela, halu tuheleñi mulelo woo, kakuli yeo kona nzila feela yatani ya ku tamahana ka yona. Mi haiba keleke ye ikazwelapili fela mo i inezi cwana, ni kukopana hamoho, Mulimu uka . . . Halina mafelelezo, ku Sa ka eza, haiba lu ka swalisana hamoho. Lu swanela kuswalisana hamoho. Kona mo lu batela kubela, baba tamahani hande ku mañi ni mañi, mi ni kutalelela hande mwa mazoho a Mulimu.

<sup>58</sup> Kipeto lu swanela kuba ni mutu yo lu lumela kuli ukutaza Linzwi la Mulimu. Haiba muuna wateni haezi cwalo, kipeto munge yakona ku lieza. Kona mo luswanela kuyemela cwalo. Haiba katengo ka basepahali kaka yemela ze lukile, kipeto ki musebezi wa mina kuketa mutu ya ka yemela ze lukile. Mi cwale ha muela cwalo, muine ka zona. Ku itingile ku mina. Muyeme ka zona. Mi, kaufela hamoho, lu yemezi Nto iliñwi, yeo ki Mulimu.

<sup>59</sup> Haiba mutu a fosa, musike mwa mu leleka. Mu mutuse. Mu mu nanule ayeme. Mube hamoho, mube ni ku utwana yomuñwi ni yomuñwi. Kona sa bulela Mañolo. Ha lu eza mafosisa, ha luyeni fapila Mulimu. Lusika ya kale fapila Mulimu, luna ni kuya fapila pila ya filikani.

<sup>60</sup> Ne nina ni kueza feela ona cwalo. Mi Ni ziba kuli Ne ni fosize. Ne ni bulezi buhata, na tiseleza musala ka kubulela buhata. Na sepa Ne ni mi bulelezi zona, ona mwa keleke moo. Neli mazazi amanyinyani fela, ha ki kale hahulu, sekubile lisunda ze silezi kwa mulaho. Ba likoloti za milao ne ba ni yemi, bakeñisa lipatisiso ze, kufitela mane Ni palelwa kuziba fo ne Ni inzi. Kona hane ni sa zo fita feela kwa ndu kuzwa kwa ofisi, ku yo ca

mulalelo. Mi luwaile ka nombolo ye sa zibahali lwa lila, mi Meda a yo alaba luwaile. Abeya lizoho fateni, ali, “Ki bona ba za milao bani hape.”

<sup>61</sup> Na li, “Ne ni sakoni kuitiisa manzibwana amañwi. Toho yaka ne i utwahala kuli ya kumuha kwateni. Ni ya ni lyangana mwa toho, ne ni hohelwa fela kwaa ni kwani, ni kwaa.” Na li, “Ha ni sa kona cwale.” Mi Na tulela mwahalimu, se Ni li, “Ba bulelele kuli Ha ni yo,” mi se ni matela kwa mulaho wa ndu kwa mandaamino.

<sup>62</sup> Ha Ni yo kuta . . . Meda uziba hande lika zeo ka tokomelo. A ni katana fa munyako, inza bata kulila. Mi ali, “Bill, kana neli nto yende yo ezize yani?”

<sup>63</sup> Wa ziba mo uinezi. Na ziba mo Ni inezi. Na li, “Luli. Ne ni si yo mwahali mo fani.” Na ziba kuli Mulimu na ni nyazize ka zona. Na li, “Ne ni si yo mwahali mo fani.”

Ali, “Kono no li teni fa na liziza.”

<sup>64</sup> Musihali wani Na yo lapelela mbututu yana kula. Mi Ni si ka zwa kale mwa ndu, luwaile lwa lila hape, mi Joseph yomunyinyani ayo swala luwaile ni kubulelela kuli, “Tate, mubata ni ba bulelele kuli ha mu yo?” Mwabona sibi mo si sinyeza, lubasi lwani ne lu kaba cwani?

<sup>65</sup> Joani Wapili, kauhanyo ya 5, ni timana ya 21, iize, “Haiba lipilu zaluna ha li lu nyazi, kipeto luna ni sepo ku Mulimu.” Kono haiba lipilu zaluna li lu nyaza, lukona cwani kuba ni sepo ku Mulimu? Lwa ziba, haibile fela luna ni sibi se si si ka bakelwa, Haana ku lu utwa. Yeo itiile, kono, ki—ki—ki, keleke itokwa lika zee.

<sup>66</sup> Mi Na kalisa kulapelela mbututu yoo. Mi cwale Na kalisa ku mu beya mazoho, Mulena a ni kalimela mi ali, “U bulezi buhata. Ha u swaneli kulapelela mbututu yoo.”

<sup>67</sup> Na zwa ku muuna yani. Na li, “Muñaka, libelele fa. Nina ni se ni lukela kulukisa.”

<sup>68</sup> Na lizeza muyemeli wa milao yani ni kuya kwa ofisi, na yo mu bizeza mwahali. Na li, “Talima, muñaka, Ne ni bulezi buhata. Ne ni tiselize musalaka kubulelela buhata. Na bulezi kuli Ne ni siyo, mi se Ni matela kwa mulaho wa ndu.” Mi Na i pulela zona ni ku mu bulelelela kazona.

<sup>69</sup> A yema ni ku ni muswala fa liheta. Ki hali, “Muzwale Branham, Ni bile ya na ni sepo ku wena, kono cwale Na kusepa kufita sapili cwale, mi muuna,” ki hali, “ya tabela ku lukisa mafosisa a hae.”

<sup>70</sup> Na mu bulelelela, Na li, “Na kalisa kulapelela mbututu, mi Mulena a ni nyaza fela, mwa pilu yaka, kakuli Ne ni ziba kuli Ne ni fosize.”

<sup>71</sup> Mi, zazi la habusa, musala ka ali, “U ya kai?”

Se nili, “Kwa liñope laka.”

<sup>72</sup> Mi Na ya kwa liñope laka, fahalimwa Charlestown, kone Ni sweli kuyanga, hala myaha. Na kena mwani, mi Na lapela musihali wani kaufela, “O Mulimu usike wa ni tuhelela kueza nto yecwalo fateni. U ni swalele, Mulena, kakuli ha Ni kalisa kubeya mazoho aka fa bakuli, ni kulapela, mi Na nyaziwa.” Kutaha cwalo ka sili kiloko manzibwana, Na zwela fande. Kuna ni licwe le lituna le libeilwe kwani. Mi Na swala licwe lani mi ne ni talima kwa neku la upa, ni mazoho inge ananuhezi mwahalimu, na lumba Mulena. Mi ne ku kuzize feela kulo kwani. Mi Na li, “Mulena, haiba Uka eza feela . . . Nako iliñwi Ukile wa fita bukaufi ni Mushe, mi ki hali ne li . . . ha no Mubeile mwa liñope la licwe, mi wa bonahala inge mukokoto wa muuna.” Na li, “Kana Wakona kueza cwalo hape, Mulena? Ni bata kuziba kuli Ni swalezwi.” Mi Na li, “Haiba Uka ni tusa ni kutaha mwa muhupulo waka . . .” Na li, “Mulena, Ha ni si katiya, mwa mihupulo, kakuli Hanina tuto.” Na li, “Mi Na—Ni lika ku sebeleza Wena. U ziba pilu yaka, mi Ne ni si ka . . . Ne ni sa lukeli kueza cwalo. Ne ni sa bati kueza cwalo. Toho yaka ya utwahala fela inge ika kumuha kwateni, Ne ni ikalezwi hahulu, mi Na eza cwalo fa nako nyana feela Satani fa na ni swalezi.” Na li, “Haiba Uka ni swalela, ni konise ku Kubona, he, Mulena.”

<sup>73</sup> Mulimu kakuba Muatuli waka; fa kaufi fela ni na, sibaka nyana mwa macacani kwa kalisa kupikuluha inge Kakundukundu, mi Ka taha kwa matuko ni liñope ko ne Ni inezi, mi ka liba mwa mushitu. Oh, muzwale, kozo ye fitelela kutwisiso ya ni tahela, mi Na lila. Na bokolola. Na huwa. Na ziba kuli libi zaka za swalelwa. Mwabona, Ne ni li kwahule ni Mulimu, Ne ni palezwi ku lapelela mwana kuli atamululwe.

<sup>74</sup> Na . . . Mi lizazi lelitatama luli nekuna ni muuna yana zwa kwa Chicago, yali muuna yomutuna, wa Katolika ya na sa zo baka feela, misinga ya pilu ya hae ne i luluhile sina chubu ya pompilwe moya, mi ne ba likile ku a pumaka fa nako yetelele, nebaka eza cwalo, mi na ba hanelanga. Mafelelezo a fumana nako ya lipuzo za hae. Lipuzo zani luinanga nako yetelele kufitela lufumana se si fosahalile. Mi mutu ya na ti lo kena fela, ona foo Moya o Kenile wa alunguta mwa bupilo bwa hae kwa mulaho ni ku shitula taba yeñwi ya na ezize ha na banga fela mushimani wa kwa aletare mwa mwa keleke ya Katolika. Ki hali, “Yeo kona niti. Yeo luli ki niti ye sepahala.” Ali, “Utalusa kuli zani ne li ni nyaza?”

Na li, “Kona feela muluti o Ni bona mwa bupilo bwa hao.”

<sup>75</sup> A yo kuta ni kubulelela dokota, ali, “Ku lukile, amu lukise lika cwale, lu ka mu pazula.”

<sup>76</sup> Dokota ali, “Lu ka tatuba kalulo ya kale yani hape.” Mi ha yo talima fateni, ali, “Ha u tokwi kupazuliwa.” Mwabona?

<sup>77</sup> Haiba lipilu zaluna za lunyaza, lu bata tukuluho ye tezi. Ha lu tokwi kuba keleke, ya licika. Lu bata kuba keleke ya

luli kamba lusike lwa ba keleke ni hanyinyani. Lu bata kuba Bakreste ba niti kamba lusike lwa ba Bakreste ni hanyinyani. Lu bata tukuluho ye tezi kuzwa kwa mikwa yaluna, kuzwa kwa libi zaluna, kuzwa kwa minahano yaluna yemaswe, kuzwa kwa likezo zaluna zemaswe, kuzwa kwa ku sa tokomela kwaluna, kaufela ze lu ezize. Lu bata tukuluho ye tezi, ili kuli batu ha ba taha mwa keleke mo, ku to lapelelwa, ku kaba fela sikwata nyana se (mwendi ikona kuba babasa fiti fa mwanga, kamba yemibeli) baba hanzi moo, kono ba kaba hande mwa mazoho a Mulimu. Mi ha lu lapela, kipeto Mulimu uka utwa ali mwa Lihalimu. Mulimu ubata mutu yo Akona kuswala mwa mazoho a Hae, mutu yo Akona kubulela kuli, “Nina ni sepo ku yena. Na kona ku luma yo, mutanga Ka ya kula, kuya kwa Branham Tabernacle kwa Jeffersonville, mi sikwata sa batu sani si inzi pilu iliñwi.” Kuna ni se si kaezahala.

<sup>78</sup> Kihande, mutalime Sa luezezanga mwa buino boluli ku bona. Kiñi sa Na kaeza ha ne lukaba pilu iliñwi ni mwa buñwi? Nzila fela ye lukona kuzwa zeo, ki ku tamahanya lipilu zlauna hamoho ka lilato la sizwale, lu utwele babeleki ba mwa keleke, ni mulisana, ni ku utwela Mulimu. Kipeto Mulimu uka beleka ka mulisana, ka katengo, kushetumuka cwalo ni mwa keleke, mi kaufela hamoho ki siñomoto silisiñwi mwa Mubuso wa Mulimu. Mi kipeto Mulimu uka utwa, ha luna ni sikwata se si swalisani. Kusike kwa ba se si ka mi kataza. Musike mwa bilaezwa ki sika.

<sup>79</sup> Cwale, wani kona mufuta wa mutu yoo Mulimu na lukisize kunga naha. Mushe na li ya kwanelezi hande, nali mutu ya na sa keshebisi lika. Haiba nekuba ni likañi ni lifapano, ni zeñwi cwalo, yena na sa keshebisi. Kona za bata Mulimu ku luna cwale.

<sup>80</sup> Faro na bata kulumela, ali, “Mushe, mina kaufela mwakona kuya, mi, kono, musiye bana ba mina kwa mulaho, kamba musiye kwateni zeñwi za likomu zamina kwamulaho.”

<sup>81</sup> Kona mwa ezezanga diabulosi ha bata kuli Mukreste atahe. “Ikaba feela hande kuli u ikopanye mwa kelee, kono usike wa swalela Jones. Ikaba fela hande haiba wakona kutisa za hao. . . haiba wakona ku ya. . . Ha u lukeli ku itoboha kuzuba kwa hao, kunwa kwa hao, kupuma kwa hao, kuuzwa kwa hao, kutama batu ka milatu kwa kwao, lusebo. Ha u lukeli kutuhela zeo. Ikopanye feela kwa keleke.”

<sup>82</sup> Kono Mushe na si tabela kukeshebisa. Na bata tukuluho yetezi. Ki hali, “Haluna kusiya niheba taku iliñwi mwa mulaho. Lu kanga kaufela zeli za luna, ha lu yo sebeleza Mulena.”

<sup>83</sup> Kona mi ilukela kubela keleke cwalo. “Lu ka nga kuluka. Lu ka nga kukena. Lu ka nga Moya o Kenile. Lu ka nga sikwata se si swalisani ha lu ya kwa aletare. Lu kaba sikwata sa niti. Hakuna se lu ka siya mwa mulaho. Lu ka nga lika kaufela. Hakuna kuba niheba taku iliñwi ye ka siiwa kwa mulaho.” Mwa ziba,



mi batu ba lukela kulapela ka mukwa o cwalo kuli mane konji diabulosi a ñale.

<sup>84</sup> Kona Mushe ni sikwata sa hae mo ne ba ezelize. Ba ya kwani mi bakena mwatasi a Mali. Mu lemuhile, konji ha ba yo kena mwatasi a Mali, nekusina tukuluho ye tezi. Mushe, yena kasibili, na swalisani ni Mulimu, kono Isilaele na si cwalo. Ne ku sa na ni sibi. Mi ba bilaela ka Mushe, mi se bali, “Kupalañi, kiñi so ezeza cwalo? U lutiseza hahulu butata.” Kakuli, Faro na ezize feela habeli kwa palo ya masitina abona, ni zeñwi cwalo. Yani neli Mushe; nali fela handende mwa mazoho a Mulimu, na kauhani kufelelela kwa kulisa lingu, ku yo lisa lingu za Mulimu. Na lukulihile luli kufitelela, yena kasibili. Kono sicaba ne si si ka lukuluha, kakuli ne ku sa na ni mwaumbunwa mwahala bona.

<sup>85</sup> Busihu bobuñwi fani Mulimu ha na tomile kuli ngunyana ilukela kubulaiwa, mufuta wa Kreste, mi mali na cimbekwa mwa hisopa, yeo, mane neli bucwani fela (bobu zibahala kai ni kai bobubunolo), ni ku itusisa kusasa fa minyako ni fa likwalo, fani kona Isilaele fa ana bezi ya lukuluhile kufelelela, kusina niheba taku ya komu yene siyezi mwa mulaho. Kaufela ze ne li za bona ne li lukuluhle. Mabasi abona, balatiwa ba bona, ni lika kaufela za lukululwa ha ba yo taha mwatasi a mali.

<sup>86</sup> Foo kona keleke fo i ta lukululwa kufelelela, ki foo linto kaufela ha se litile mwatasi a Mali. Mi libi za hao halita mwatasi a Mali, foo kuzuba kwai kwa hao, foo kulaula kwa hao, foo kupuma kwa hao, foo kuuzwa kwa hao, foo kubulela buhata kwa hao, foo lika kamukana ha se litile mwatasi a Mali, kipeto ku kaba tukuluho ye tezi. U foselize mutu, kondisa litaba zeo. Ha u koni kutisa seo mwatasi a Mali, hasina kuina. Ha ukoni ku si tisa. Sesiñwi hasina ku ku lumeleza kuli ueze cwalo. Haiba wena u tamuluzwi, utahile mwatasi a Mali, ku kaba ni tukuluho ye tezi; kipeto ukaba ni tukuluho yo si ka ziba kale fateni. Haiba lika kaufela litisizwe mwatasi a Mali, litisizwe mwatasi a ku ipeya kwautwela Mubuso wa Mulimu, kipeto ku kaba ni tukuluho yetezi.

<sup>87</sup> Jesu na talelezi, neli mutu ka kutala. Na lila sina mutu. Na ca sina mutu. Na kona kukatala sina mutu. Na li ya kwanelezi, handende neli mutu, mwa butu bwa Hae bwa nama. Mi ni Moya wa Hae, Nali ya kwanelezi, Mulimu ka kutala, kacwalo Aeza kuli mubili wa Hae uipeye kuutwela Moya o noli ku Yena. Mwa bona, Na likilwe ka mikwa kaufela sina luna. Na li mutu, isiñi Lingeloi. Na li mutu. Nana ni litakazo ni miliko, sina fela mo luinezi. Biblele ibulezi kuli Na li cwalo. Na li mutu, isiñi Lingeloi fahalimwa a muliko. Maheberu 1 ibulela ili, “Na li. . .” Maheberu 1:4 ili, “Na ezizwe mwatasi nyana a Mangeloi.” Na li mutu, mutu ya kwanelezi handende; yoo Mulimu nangile mutu ya kwanile hande, kuli atise tukuluho yetezi, mi A Mu taza ka Moya wa Hae. Moya o Kenile no li ku Yena, kusina tikanyo. Mi A likiwa sina luna mo lu likelwa. Mi Nali Mulimu ya kwanile.

Na bonisize cwalo Ha zuha kwa bafu, ha Na yemisize libupiwa, liwate lene lili buhali ni mandina a buhali. Ha Na bulezi kwa likota, ni zeñwi cwalo, ne li Mu utwa. Na li Mulimu, mwahali. Mi Na ka ba mutu, kakuil Na li mutu, kono Yena a i kambusa ku yena Kasibili (kuba sina mnutu) kukena mwa mazoho a Mulimu, kwa sebelezo ya Mulimu.

<sup>88</sup> Mi ki Yena mutala wa luna. Luna lu baana ni basli. Hape lu Bakreste. Haiba ki Yena mutala wa luna, ha lu ipeyeñi ililuna mwa mazoho a Moya o Kenile, kuli lukone kuba sicaba sa Mubuso wa Mulimu.

<sup>89</sup> Na li mutu ya kwanile; Na li Mulimu ya kwanile. Kono A itoboha kwa neku la mubili wa Hae. . . ni lilama za ama za Hae, ni minahano ya Hae tota, ni likezo za Hae tota, ni lipilaelo za Hae tota mi, “Ni eza feela se si tabisa Ndate.” Ki fo he cwale. Kulukululwa kufelelea kuzwa kwa batu. Baprisita ne ba taha ku Yena, baana babatuna, mi se bali, “Rabbi, wa *kuli-ni-kuli*,” ni kulika ku Mu leka ka masheleñi kuli akene mwa likwenda zabona ni likopano. Kono Na li ya ipile kufelelela kakuli Na sepa ku Mulimu.

<sup>90</sup> Kana muñoli wa Lisamu ha si kali, “U ka Mu lamulela, kakuli U sepile ku Na ka kufelelela”? Mwabona? “Ni ka lamulela Mulatiwa wa Ka kwa linja, kakuli U sepile ku Na.”

<sup>91</sup> Hola yeñwi ha lu taha kwa mafelelezo a musipili, Ni bata cwalo ku na. Ni ziba kuli mubata cwalo ni ku za mina. Ni bata a Yo bulela kuli, “Ni ka mu lamulela kwa meeno a lifu, kakuli u sepile ku Na. Ni lamulela kwa libita, kakusasana wa zuho, ku mu lamulela handende, bubeli bwa moyo, mubili, ni Moya, kakuli u sepile ku Na.”

<sup>92</sup> Misebezi ya Jesu kaufela ne ikwanile hande. Kamukana ne li kwanile, kutala, kulukuluha. Na lukuluzi wa mbingwa ka kutala kwa mbingwa ya hae. Na lukuluzi musali kwa butata bwa hae bwa mali, ona mweya. Na lukuluzi lifasi kwa sibi sa lona, nako Ya shwa ka lizazi la sitabelo. Na lukuluzi kwa sibi kaufela. Na lukuluzi Keleke. Kuli kusike kwaba ni tuso ya luna kupila mwatasi a bubotana, sicaba. Hakuna tuso ya kuli lupile mwa buino bo bu komilwe, kakuli Na komile diabulosi ni kunga milonga kaufela ni mata, mi a ibeya mwatasi a mahutu a Hae, mi haina tukelo ni yekana ya ku mibusa. Luna lu Bakreste, babatezi Moya o Kenile. Ha lu tokwi kuba ni- . . . kulumeleza diabulosi ku lu laela za kueza. Krete u lu lukuluzi, tukuluho ye tezi; u lu kulukuzi kwa bumaswe, u lu kulukuzi kwa sibi, u lu kulukuzi kwa mikwa, u lu kulukuzi kwa kubulela bulela, u lu kulukuzi kwa—kwa kutibelwa, u lu kulukuzi kwa mikwa kaufela ya masila. U lu lukuluzi kufelelela ni kubeya kuluna mazoho a Hae a kenile; ka kukwana, ili tukuluho yekwani.

<sup>93</sup> U lamulezi kwa matuku a luna. U lu lamulezi kwa matuku, kakuli luna ni pampili ye lu yemela ku zeo. Haleluya! “Kakuli

Na holofalezi bumaswe bwa luna, ka miupa ya Hae ne lu folisizwe.” Ki yena Mufolisi waluna. Ki kabakaleo musali yani, yomunyinyani, wa mubotana, yana lika kubabalela muuna hae yana bulaiwa ki kansa, akena mwa libaka za Pila ya Mulimu. Nana ni tumelo. Mi yena. . . Madokota ne ba ezize kaufela ze bakona kueza, kacwalo a latelela litaelo za Mulimu mi a lamulelwa ka kutalelela.

<sup>94</sup> Balutiwa neba nile ni tukuluho yetezi, tukuluho yekwanile handende. Kiñi? Kakuli ne ba talizwe handende ni ka swanelo ka Moya o Kenile. Mi wena, ka kuba feela membala wa keleke ni kuswalana mwa mazoho a mulisana, kamba yomuñwi. . . yana bile ni mufuta wa kutwisiso ya kutulaka tulaka, kuhuwa, kubulela ka malimi, kamba nto yeñwi yeshutana; kono niteñi u sa na ni pilu seta mwa pilu ya hao, likezo zeipitezi, kubulela buhata, kuzuba kwai, kulakaza basali; kuna ni se si sika ezahala kale. Kuna ni se si fosahalile. “Kakuli ya lata lifasi, kamba lika za lifasi, lilato la Mulimu haliyo ku yena.” U lyanganisizwe. “Ka miselo yabona mu ka ba ziba.”

<sup>95</sup> Kaufela luna lubata kutamahana hamoho, ka Moya o Kenile. Mutu ni mutu uswanela ku tamahana, ni yomuñwi. Lilato la Mulimu li suluhezi mwa lipilu za luna, ka Moya o Kenile. Li lu kenisa kwa kusaluka kwaluna kaufela. Lu tamuluhile kwa lika za lifasi. Jesu naize, “Ka se batu ba ka ziba kuli mu balutiwa ba Ka, ha mu na ni lilato, yomuñwi ku yomuñwi.” Mutu alimuñwi ha ka lata yomuñwi hahulu kuli mane wakona kushwa ka zona.

<sup>96</sup> Mi nto iliñwi yemaswe haikala, lifasi la kwande, babañwi ba basali bataha ni kubulela kuli, “Cwale, talima, mulikani. Ne ku kaba hande ha no kaeza se, kamba *sani*, kutina se, kamba kueza *sani*, kamba kueza se, ni kuzwa kwa sikwata sa bapikuluhi babakenile bani,” kamba zeñwi ze cwalo, lu swalisani hahulu ni Mulimu!

<sup>97</sup> Mu li, “Kihande, Muzwale Branham, ki muliko o maswe.” Kono Kreste na shwezi ona mulelo woo. Diabulosi u komilwe. Lu bata tukuluho ye tezi. Lu bata keleke ye kenile mi yesina litiba ni ye si ka zwakana, ni yetapile mwa Mali a Ngunyana, ni yetezi Moya o Kenile, ni lisupo ni ze komokisa ni limakazo. [Hakuna manzwi fa tepu—Mu.] . . . lukulula mañi ni mañi. [Hakuna manzwi fa tepu].

<sup>98</sup> Mulimu Yomunde, Wena ha u ngi lika konji haiba li lukuluhile kufelelela. No si ka amuhela sitabelo se si na ni nyazo kusona. Nosike wa amuhela tapelo, haiba kuna ni sibi mwa mulaho wa bupilo bwa mutu yoo. No sa ezi fela zeo, Mulena. No si ka lieza mwa masika a fitile, mi Hauna ku lieza kacenu. Kono sitabelo siswanela kuba se si tokwile nyazo. Mulena Mulimu, halunze lu ipeya fa aletare, bupilo bo bu italekile, zwisa ku luna, O Mulena, linyazo kaufela za sibi. Ni lula moyo wa ka ka kufelelela, ni mubili waka, ni mata a ka, ni kuikataza kwaka,

ni keleke ye kakusasana cwana, fa aletare. Lu kenise ka Mali a Hao, mi luswalele kwa sibi kaufela se lu ezize. Mi cwale Moya o Kenile omutuna uine mwahali ku luna handende, mi ni Pata ya Hae izamaye ni luna kuzwa mwa tabernakele mo kakusasana cwana, kuli luzibe mwahala luna kuli U lu swalezi. Mi kipeto tapelo ikaba kuli, “Swalele milatu yaluna sina mo lu swalelela baba lu foselize.” Lumeleza cwalo, Mulena.

<sup>99</sup> U be fakaufi ni luna cwale, lufuyole ni ku lu buluka kufitela lukopana hape kwa sebelezo ya manzibwana. Ha lu tahe ka mazoho a kenile ni pilu ye kenile, kuli Hauna ku i hana, kakuli lu bata tukuloho yekwanile mi ye tezi kuzwa kwa sika kaufela, Mulena, ye ka lu beya kwa ku sa ba liseli la lisweli; kandela ye beilwe fahalimwa lilundu, kusina tubana fahalimwa yona, kono kandela ye tomilwe fa lilundu, yefa liseli la ku zamaisa mahutu a batu mwa nzila ye lukile. Lumeleza cwalo, Ndate. Lwa kupa ka Libizo la Jesu, ni kwa Kanya ya Hae. Amen.

<sup>100</sup> Ni ka kupa Doc . . . Ni sepa uinezi kwa mulaho kwani, kamba alimuñwi wa madikoni yaliteni. Kuli keleke ikone kubala se, Doc, taha utobeya taba ye fa limati la papazo kuli keleke ikone kubona hanze bazwa. Mi kipeto Muzwale Collins, haiba uteni mo . . . Kana Muzwale Collins uteni? U mufe ye.

<sup>101</sup> Mi, ku lukile, sha, mi lu ka bona zateni. . . [Muzwale Branham wa kutumana ni kubala kapampili—Mu.] Ki mutu ya bata kuba ni lipuzo ni na. Zeo kamita li amuhezwi. Lu tabile.

Mi Ni na ni lipuzo zeo. Mwa bona, ze muna ni kuezwa ki kuliza nombolo yaluna yefilwe fani. Ne—ne luna ni butata hahulu kwa ndu, keleke ya ziba cwalo. Ba ki baenyi. Keleke ya ziba ka zona. Ku lukela kuba ni kaemba nyana kaka beilwe. . . Ni ka ka beya mwa keleke mo, hape, ku babanca. Mwa bona, kuna ni babañata hahulu, kuli halukoni ku ba kwanisa kaufela, habanze ba taha cwalo ka lipalo. Mwabona? Mi luna . . . Haiba fela muliza BUTler 2-1-5-1-9, BUTler. [Nombolo ya telefoni icincizwe.—Mu.] Mi buñata bwa ma membala bababona yo kaufela ya bata cwalo, Ni ya tabile kamita kubona sicaba. Kono luna ni mulao o ezahala wa kamita. Kuna ni babañwi baba bizizwe kale, cwalo, mwabona. Mi lutile fela ka, alimuñwi ka alimuñwi, hane lu taha. Mi kipeto kuba . . . Neku banga kuli, nelubanga fela ni mufuta wa sipundumukela, nzila kaufela, kutula, kuicuncula, sicaba ne si ya kwa mandu inge si swabile. Cwale ni fela kamukana hande mwa sikuka. Mi seo kona se lu lika kubulelela cwale, mwabona, kubeya lika kaufela mwa sikuka sa zona, ka swanelo feela.

Mi Ni ka tabela kubona ona mukiti omunde wo, haiba ba ka liza fa BUTler 2-15-19 (1-5-1-9), mi Bo. Mercier kamba Bo. Goad, alimuñwi wabona, uka alaba luwaile ni ku mi bulelela lizazi le mu swanela kuba ni kutaha. Luna ni sibaka kulo kwnai, se si fukisa moya obata, mi lu utukisize kuamuhela sicaba ni sikusi lapelela. Lu tabile feela ka kuezwa cwalo.

<sup>102</sup> Cwale, libaka le Ni sa telangi kwa keleke, sicaba si nahana kuli Ni batanga kuikambusa kwa batu; ha ki cwalo. Ni lika ku—ku ba hande mwa sikuka. Mwabona? Kona mo Ni bata kubela cwalo, ha libonisi likute ku mutu. Mutu ni mutu, ufi kaufela, kai ni kai, ka nako kaufela, mwabona; mubala, tuto ya tumelo haina sa kueza ni zona. Lu taha ona koo lu to kopana ni sicaba. Mi haiba bana ni ze ba tokwile, luinelela hamoho ni Mulimu kufitela li talimwa. Haiba ba bata kuziba sika ka za mikopano, eni sha, lwa li tokomela ni ku liñola za bulukiwa. Koo fela ki kuzamaiswa ka Moya o Kenile. Mi zeo. . . Nzila yeo, Ni sepa kuli fela ki, sieza mañi ni mañi ka kuswana fela. Kabakaleo, hakuna ku ketulula mutu, hakuna likute.

<sup>103</sup> Kana kuna ni batu babatilo lapelelwa, kakusasana cwana, baba kula mi ba bata ku lapelelwa? Ku lukile. Hakuna niyomukana.

Konakuli ha lu opeleñi pina yende ya . . . milapelo. Ki ifi yelukona kuopela kakusasana cwana? “Ki sikamañi se si ka takula sibi saka?” Wa i ziba, Teddy? “Hakuna sesiñwi kwanda Mali a Jesu.” Kiñi se sikona. . .

[Kezeli mwa kopano ukandeka za kalibe ya kulile hahulu—Mu.] Ku lukile, sha. Mu bata ku mu lapelela cwale?

Ni ka lapelela kalibe yani. Mubeye mazoho ku yena musali yo fa. Amuinamise litho za mina hamoho nina, kanti, ka kukuza cwale. [Muzwale Branham usiya maikulofoni ya fa katala—Mu.]

<sup>104</sup> Mulimu Yomunde, kuna ni kalibe ya kulile hahulu. Kezela luna ubeile mubili wa hae, niheba kunga kansa kuzwa kubabañwi, kuyema mwa pakani, ya babañwi. Kono Aku mu lamulele ku zeo, Mulena, mazazi nyana afitile, lika zani ha li to zibahala. Hakone fela ku lemuha, ni yena, kanti, Mulena, uka ziba kuli li zwelela ku Wena. Ni mu beya mazoho fahalimu, ni kukupela sishemo ku musali yomuñwi yoo ayemela yani. Mi sishemo sa Mulimu, Mata a Moya o Kenile. . . Haiba kuna ni bumaswe bobucwani kaufela mwa lipilu zaluna, Mulena, li patulule ku luna, pili, mi lu ka ya, lu yo li bakela. Mi lu ziba kuli luna ni kuhauhelwa ki Mulimu, luna ni kozo ni Mulimu, lufiwa ze lu kupile, kakuli haluna katulo. Lumeleza cwalo, Mulena. Ka Libizo la Jesu Na lapela. Amen.

Ku lukile. [Muzwale Branham ukutela kwa katala—Mu.]

Kiñi se si ka ni tapisa?  
Hakuna Konji Mali a Jesu feela;  
Kiñi se si ka ni kenisa?  
Hakuna konji Mali a Jesu feela.

Oh, ki sibuba kwabunde  
Se si ni kenisa sina litwa;  
Hakuna siliba se Ni ziba,  
Hakuna konji Mali a Jesu feela.

<sup>105</sup> Ki ba bakai bamina baba utwa kuli libi zamina li mwatasi a Mali? Ha lu iopeleni ka mazoho a nanuhile cwale.

Kiñi se si ka ni tapisa?  
 Hakuna konji Mali a Jesu;  
 Kiñi se si ka ni kenisa?  
 Hakuna konji Mali a Jesu feela.

Cwale halunze luwisa mazoho aluna, ha lu swalaneñi mwa mazoho.

Lelinde ki . . .

Kona hande, kwa libaka kaufela.

. . . buswe sina litwa;  
 Hakuna siliba se Ni ziba,  
 Hakuna konji Mali a Jesu feela.

Mwa Mu lata? [Kopano ili, “Amen.”—Mu.] Amen.

Oh, mo Ni latela Jesu,  
 Oh, mo Ni latela Je- . . .

Cwale muine ni luna, cwale. Mañi ni mañi mukumalele ku Mulimu.

Mo Ni latela Jesu,  
 Kakuli U ni latile pili.  
 Ha nina ku musiya . . .



*TUKULUHO YE TEZI* LOZ59-0712  
(A Total Deliverance)

Liñusa le ka Muzwale William Marrion Branham, neli kutalizwe lwa pili mwa Sikuwa la Sunda kakusasana, Sikulu 12, 1959, ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatizizwe ni ku hasanyiwa kiba Voice Of God Recordings.

LOZI

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buńata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleni ku sina tumelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)